



ТОШКЕНТ ХАКИКАТИ

Вилоят ижтимоий-сиёсий газетаси

TOSHKENT HAQIQATI

1928 йил 11 декабрда асос солинган

• 2002 йил 12 январь, шанба • №03 (11.391)

• Эркин нарҳда сотилади

Ўзбекистон Республикаси Президентининг
ФАРМОНИ

«O'zbekiston Respublikasi Qurolli Kuchlariga 10 yil» эсдалик нишонини таъсис этиш тўғрисида

Ўзбекистон Республикаси Қуролли Кучларининг ўн йиллиги нишонланиши муносабати билан ҳамда давлатнинг мудофаа қобилиятини мустаҳкамлаш ва Қуролли Кучлар қурилиши ишига муносиб ҳисса қўшган ҳарбий хизматчиларни рағбатлантириш мақсадида:

1. «O'zbekiston Respublikasi Qurolli Kuchlariga 10 yil» эсдалик нишони таъсис этилсин.
2. «O'zbekiston Respublikasi Qurolli Kuchlariga 10 yil» эсдалик нишонининг Низоми ва тавсифи тасдиқлансин.

Ўзбекистон Республикаси Президенти

И. КАРИМОВ.

Тошкент шаҳри, 2001 йил 25 декабрь.

МУКОФОТ МУБОРАК!

Ўзбекистон Республикаси Президенти Ислам Каримовнинг 2002 йил 10 январдаги «Ватан ҳимоячилари қуни муносабати билан Ўзбекистон Республикаси Мудофаа, Ички ишлар ва Фавқулодда вазиятлар вазирликлари, Миллий хавфсизлик хизмати, Давлат чегараларини ҳимоя қилувчи ҳамда Божхона қўмиталари, «Ватанпарвар» ташкилоти, ҳуқуқни муҳофаза қилувчи органларнинг алоҳида ўрнатилган ходимларидан бир гуруҳини мукофотлаш тўғрисида»ги Фармонида биноан Ватанимизнинг мудофаа қудратини юксалтириш, чегараларнинг дахлсизлигини ва миллий хавфсизликни таъминлаш, ёшларни ватанпарварлик руҳида тарбиялаш, ҳуқуқ-тартибот ва эл-юрт осойишталигини мустаҳкамлашга қўшаётган катта ҳиссаси, мамлакатимизнинг қурол-

ли кучларининг жанговар ва сиёсий тайёргарлигини ошириш, давлатимиз сарҳадлари дахлсизлигини ҳимоя қилишда мардлик ва фидойилик намунасини кўрсатганлиги, миллий манфаатларимизни ҳимоя қилишдаги жасорати, халқимизнинг осойишталигини таъминлаш ва ҳуқуқ-тартиботни мустаҳкамлаш борасидаги катта хизматлари учун алоҳида ўрнатилган ходимлардан бир гуруҳи Ватанимизнинг юксак унвонлари, орден ва медаллари билан мукофотландилар.

Улар орасида Тошкент вилояти ички ишлар бошқармаси жиноят қидирув бўлими башбарши Пардавай Сабинович ҚАЮМОВ ҳам «Жасорат» медали билан тақдирланди.

Биз уларни юксак мукофотлар билан қутлаймиз.

АНГРЕН УЧУН ЛОЙИХАЛАР

«Ўзбекрезинотехника» бирлашмасида хорижий сармоялар иштирокида уч лойиҳани амалга ошириш устида иш олиб борилмоқда. Янги ишлаб чиқаришни ташкил этишда бирлашмага Германия, Швейцария, Туркия ва Словакиянинг компаниялари ҳамкорлик қилишмоқда.

Биринчи лойиҳада Германиянинг «Унионматекс» ва Словакиянинг «Матадор» корхоналари иштирокида энгил автобиллар учун йилига 1,5 миллион дона, юк автомобиллари учун 500 минг дона шиналар тайёрлаш кўзда тутилган. Ушбу ишлаб чиқариш линиясини ишга тушириш учун 80-100 миллион немис маркаси миқдорда капитал маблағлар жалб этилади. Лойиҳанинг техник иқтисодий асосини ишлаб чиқишда «Ўзкимёлоийха» институти ва «Унионматекс» мутахассислари яқиндан ёрдам бердилар.

Иккинчи лойиҳага кўра, Туркиянинг «Аксеус» компанияси ҳамкорлигида ва Жаҳон банки иштирокида йилига 15 минг тонна электрод ишлаб чиқарилади.

Учинчи лойиҳада «Ўзбекрезинотехника» бирлашмаси «МРС Интернейшнл Инвестмен энд консалтинг» (Швейцария) консалтинг компанияси ҳамда «Tamed Fatma GmbH» компанияси ёрдамида йилига 2 минг тонна гигроскопик монок ишлаб чиқариш қувватига эга бўлган корхона қуриш кўзда тутилди.

«Туркистон-пресс».



УМР ҚАДРИ

Халқ — донишманд. Топиб айтади. Юзлаб мақоллар, нақллар, иборалар борки, уларни халқ тўқиган, тўғрироғи, ҳаётдан олиб айтган.

Масалан, «Умр оқар дарё». Ёки шунга уйқаш «Юрган — дарё...» нақли ҳам бор. Биринчиси, инсон умри қисқа, кўз очиб-юмгунча ўтиб кетишига ишора бўлса, иккинчиси Юртбошимиз таъкидлаганидек, элим деб, юртим деб ёниб яшовчиларнинг кўп хайрли ишларни қилишга улгурган шу қисқа умрларини дарёлар саховатиға менгзашидир.

Заркентлик Тожибой ота Ризаев ана шу иккинчи тоифага мансуб инсонлардан. У «Умр оқар дарё» эмаслигини бир хўжаликка қирқ икки йил сурункали раҳбарликда кечган сермахсул ва сермазмун умри-аъмоли билан исботлади. Ота хўжалик раҳбаригина эмас. У қишлоқнинг бугуни ва эртаси учун ҳам масъул ҳис этади ўзини. Сўлим тоғлар бағридаги яшил Заркент кишлоғи бугун ҳар жиҳатдан обод. Халқи тўқ, фаровон ҳаёт кечиряпти. Қишлоқ номи билан аталувчи «Заркент» ширкат хўжалиги нафақат Паркент тумани ёки вилоят,

балки, бутун республикада маълум ва машҳур. Заркентликлар бугун ҳеч нарсага муҳтож эмаслар. Таъминот — юз фоиз. Ҳатто, замонавий шифохонагача бор.

Эл-юртга сидқидилдан хизмат қилган одам ҳеч қачон кам бўлмаган. Тожибой отанинг кўп йиллик самарали меҳнати юксак қадрланди. Ўзбекистон мустақиллигининг 10 йиллиги байрами арафасида Президентнинг Фармони билан унга «Ўзбекистон Қахрамони» унвони берилди.

Янги йил арафасида қахрамонлик «Олтин юлдуз»ини Юртбошимизнинг ўз қўлидан қабул қилиб олганим мен учун бутун ҳаётимдаги энг бахтли он бўлди, — дейди Тожибой ота ҳаяжон билан. — Оддий бир хўжалик раҳбари учун бундан ортиқ бахт борми. Қолаверса, бу биргина мен эмас, балки бутун ҳамқишлоқларимнинг камтарона меҳнатиға берилган баҳо деб биламан.

СУРАТДА: ҳамқишлоқлари Тожибой отани ҳуқуқатнинг олий мукофоти билан муборакбод этмоқдалар.

Александр МАЛЬЦЕВ олган сурат.

Шу азиз Ватан — барчамизники

Мамлакатимизда 130дан зиёд миллат ва элат вакиллари аҳил ва иноқ яшаб меҳнат қилмоқда. Шу кунларда миллатлараро дўстлик ва тотувликни мустаҳкамлашга хизмат қилиб келаётган Байналмилал маданият марказининг ўн йиллиги кенг нишонланмоқда.

Шу муносабат билан Бадиий академия кўرғазмалар залида «Шу азиз Ватан — барчамизники» мавзuida кўрғазма очилди.

23 январга қадар давом этадиган кўрғазмада турли миллатга мансуб рассомларнинг рангтасвир, ҳайкалтарошлик, графика, амалий-безак санъати бўйича асарлари намойиш этилмоқда.

О. НОРБЕКОВ,
ЎЗА мухбири.

ҚЎШИМЧА ПЎЛАТ

Ўзбекистон металлургия комбинатида мавжуд ишлаб чиқариш қувватларидан фойдаланиш самараси ортиб бормоқда.

Ўтган йили ҳам бу соҳада сезиларли силжишга эришилди. Унинг ўсиш суръати 10 фоиздан ошди. Ташкил этди. Натижада буюртмачиларга қўшимча 2,3 миллиард сўмлик кўп маҳсулот етказиб берилди.

Айниқса, пўлат золдирлар ишлаб чиқариш анча ортди. Олдинги йилнинг ўн бир ойидаги қараганда тайёрланган бу муҳим маҳсулот ҳажми 8,2 минг тонна кўп бўлди.

Бугунги сонда:

ҚАРС ИККИ ҚЎЛДАН

Жиноятчиликни олдини олишда кишлоқ фуқаролар йигини билан ҳамкорлик кучайиб бораётганлиги диққатга сазовордир.

ШУНДАЙЛАР БОР БЎЛСИН

Юзи ёруғлик — фидойилик, дехкон химматининг ифодасидир. Бундай олижаноблик ҳар бир меҳнат кишисига хос фазилат бўлиб қолаверсин.

ҚАРОР ВА ИЖРО

Халқимизда «Қоидали иш — келтирмас ташвиш» деган ибратли нақл бор. Шунга амал қилинса, ҳамма соҳалардаги юмушлар ўз маромида боришига шубҳа йўқ.

ОЛАМ ҲАФТА ИЧИДА:

Жаҳон ҳамжамияти террорга қарши ҳамкорликда курашишга киришган ҳозирги даврда ёвуз ниётли шахсларнинг қуни битмоқда.

ОНАЛАР ОЛАМИ

Бугун ота-онамизга қилган эътиборимиз, муносабат-муоамаларимиз эртага ўзимизга фарзандларимиздан қайтиши муқаррар.

2-бет

3-бет

6-бет

7-бет

8-бет

Тадбир

ДИҚҚАТ-МАРКАЗИДА – ИНСОН ҲАЁТИ

Кейинги бир йилда вилоятда фавқулодда вазиятларнинг олдини олиш мақсадида қатор тадбирлар амалга оширилди. Қўмондон-штаб ва махсус-тактик машқларда табиий ва техноген хусусиятларидаги фавқулодда вазиятларда аҳоли ва моддий-маданий қадриятларни сақлаб қолиш чора-тадбирлари пишиқтирилди.

Ёр кўчиши, сел ва тошқин хавф солган жойларда яшовчи 55 хўжалик вазият барқарор қишлоқларга кўчирилди. Дарёлар ва сойларнинг тошқин хавфи бўлган қирғоқларида 105 миллион сўмлик қирғоқ-мустаҳкамлаш ишлари бажарилди.

Тошкент вилоят фавқулодда вазиятлар бошқармасида 2001 йил якунларини муҳокама қилиш чоғида тезкор тайёргарлик, фуқаро муҳофазаси, сувда қутқаришни ташкил этиш ва бошқа

соҳалардаги ҳолатлар атроф-лича муҳокама қилинди. Бошқарма бошлиғи Пўлат Ражабов ва бошқа нотиклар асосий эътиборни машқлар қамровини кенгайтириб, шаҳар ва туман бўлинмалари фаолиятида самарадорликни янада кўтариш масалаларига қаратишди.

Йиғилишда Ўзбекистон Республикаси Фавқулодда вазиятлар вазирлиги марказининг бошлиғи полковник Маҳмуд Абдуҳолиқов нутқ сўзлади.

Ўз мухбиримиз.

Ҳамкорлик

«ЛАЗЗАТ» ХОРИЖНИ КЎЗЛАМОҚДА

Янгийўлдаги «Лаззат» кондитер акциядорлик ишлаб чиқариш жамияти ўтган йили савдо шаҳобчаларига ўн минг тонна қандолат маҳсулотлари, шунингдек, икки минг тонна хамиртуруш етказиб берганди.

Жамоа жорий йилда янада юқори натижаларга эришиш, камида 100 тонна маҳсулотни хорижга жўнатишни режалаштирган. Чет элларда бу маҳсулотларни сотиш мақсадида дўконлар ҳам барпо этил-

моқда. Шундай савдо уйлариининг бири Чимкентда ишга туширилди. «Лаззат-Чимкент» деб аталган бу дўкон ширинликларни улгуржи ва чакана нархларда сотмоқда.

Ўз мухбиримиз.

Анжуман

ЭКОЛОГИЯ ВА ТУРИЗМ

«Экосан» халқаро жамғармасида БМТнинг жорий йили Халқаро экотуризм йили, деб эълон қилгани муносабати билан «Экотуризм – атроф-муҳитни ҳимоя қилиш ва барқарор ривожланиш омили» мавзuida анжуман бўлиб ўтди.

Унда тегишли вазирлик, идора, туристик ташкилотлар, дипломатик корпус ва халқаро ташкилотлар, оммавий ахборот воситалари вакиллари иштирок этди.

Дунёда тинчликни мустаҳкамлаш, давлатларо алоқаларни, жамият маданий тараққиётини ривожлантириш, биосфера ва экология тизимлари барқарорлигини сақлашда туризмнинг аҳамияти катта. Экологик туризм ривожланиши жараёнида табиий захираларни асраб-авайлаш, ижтимоий инфратузилмани яхшилаш, атроф-муҳит муҳофазаси бўйича халқаро келишувлар, жумладан, иқлим ўзгариши, биологик хилма-хиллик, чўлланишга қарши кураш конвенциялари талабларини амалда татбиқ этишнинг кенг имкониятлари очилади.


Таъкидлаш жоизки, Ўзбекистон сайёҳлик имко-

ниятлари бўйича Марказий Осиё мамлакатлари орасида етакчи ўрин тутди. Юртимизнинг гўзал табиати, бебаҳо тарихий ва маданий ёдгорликлари, ўсимлик ва ҳайвонот олами, ранг-баранг табиий иқлим шароити жаҳондаги барча сайёҳларнинг диққат-эътиборини ўзига жалб этмоқда.

Йиғилишда атроф-муҳит муҳофазасини янада яхшилаш, экологик туризмни ривожлантириш, соҳага хорижий сармоя жалб этиш масалаларига алоҳида эътибор қаратилди. Шунингдек, халқаро экотуризмни ривожлантириш бўйича Канадада ўтказилган халқаро саммит ҳамда «Экотуризм ва Буюк ипак йўли» иккинчи халқаро анжуманига тайёргарлик билан боғлиқ масалалар муҳокама этилди.

Баҳор ХИДИРОВА,
ЎЗА мухбири.

ҚАРС ИККИ ҚЎЛДАН



Ҳуқуқ-тартибот идораларида ислоҳотлар давом этмоқда. Чунончи, милиция хизматини бевосита маҳаллий ўз-ўзини бошқарув идоралари фаолияти билан уйғунлаштириш, ҳуқуқбузарликларнинг олдини олишда жамоатчилик вакиллариининг иштироки кучайтириляпти.

— Иттифок, Чигатой Октепаси, Ўртаовул, Ўзгариш ва Хонобод қишлоқларида бундай амалий ҳамкорлик самаралари яққол кўриниб қолди, — дейди Зангиота туман ички ишлар бўлими масъул ходими, милиция майори Маҳмуд Рихсиев. — Профилактика инспекторларимиздан милиция майорлари Бахтиёр Холдоров, Бахтиёр Орифжонов, Ботир Нурматов, Баҳодир Ашуров, милиция катта лейтенанти Абдували Бўроновлар халқ посбонлари, маҳалла оқсоқолларига таяниб, аҳолининг ҳуқуқий маданиятини ошириш, ҳуқуқбузарликнинг олдини олиш борасида яхши натижаларга эришишмоқда.

Туманнинг Назарбек, Иттифок, Чигатой Октепаси, Ўртаовул қишлоқларида барча қулайликларга эга милиция таянч пунктларининг очили-

ши нур устига аёло нур бўлди. Назарбек қишлоқ милиция таянч пункти компьютер ва алоқа воситалари билан жиҳозланган. Профилактика инспектори, милиция лейтенанти Баҳодир Алимов жиноятчиликнинг олдини олишда қишлоқ фуқаролар йиғини билан ҳамкорлик кучайиб бораётганлигидан мамнун бўлиб гапирди. Маҳалла посбонлари сардори Шукр Носиров раҳбарлигидаги жамоатчилар ҳар бир ишда унинг яқин ёрдамчиларига айланишган. Ўртаовул шаҳарчасида милиция

таянч пунктининг очилиши тантанали ўтди. Фуқаролар йиғини раиси Солихўжа Норхўжаев, «Зангиота» ширкат хўжалиги раиси Иномиддин Муҳиддинов, профилактика инспектори, милиция катта лейтенанти Исроил Ҳошимовлар бу ерда кенг кўламли ҳуқуқий-тарбиявий иш олиб борилиши учун шароит яратишга алоҳида жонкуярлик кўрсатишди. Шинам, иссиқ, мукамал жиҳозланган хоналар, мажлислар зали ҳаммада ёқимли таассурот қолдирди.

Милиция таянч пунктини очиш чоғида вилоят ички ишлар бошқармаси бошлиғининг ўринбосари, милиция подполковниги Абдуқодир Раҳимжонов террорчиликка

қарши кураш, ҳуқуқбузарликларнинг олдини олиш, жамоат тартибини мустаҳкамлаш борасида мамлакатимизда олиб борилаётган ишлар ҳақида гапирди, жиноятчиликни бартараф этишда барча кучларни бирлаштиришга чақирди.

Жўрабек
МУРОДОВ.

БИРЙЎЛА 7 МАҲАЛЛАДА

Янгийўл шаҳрининг 7та маҳалласида 7та милиция таянч пункти очилди. Улар замонавий техника воситалари билан жиҳозланди.

Милиция таянч пунктларининг очилиш маросимларида вилоят ички ишлар бошқармаси бошлиғи Шораҳим Расулов, Янгийўл шаҳар ҳокимлиги вакиллари, маҳалла фаоллари иштирок этдилар.

Жамшид ҚАМБАРОВ.

КЎТАРИНКИЛИК РУҲИДА

Воҳид ШУКУРОВ,

«Нуроний» жамғармаси Қибрай туман бўлинмаси кенгашининг раиси:

— 2002 йилнинг Қарияларни кадрлаш йили деб эълон қилинишини туманимиз меҳнаткашлари, шу жумладан уруш ва меҳнат фахрийларимиз кўтаринки руҳ билан мамнун бўлиб кутиб олдилар. Улар давлатимизнинг бу ғамхўрлигига жавобан ижтимоий ҳаётда, қишлоқларни ободонлаштириш ва кўкаламзорлаштиришда, маънавий-маърифий тарбия тадбирларида яна ҳам кенгрок иштирок этишга аҳд қилмоқдалар. Шу муносабат билан жамғарманинг барча бошланғич ташкилотлари ўз фаолиятларининг истиқбол режаларини белгилаб олаётирлар. Шу кунларда Оққовоқ, Тузел, Ўнқўрғон қишлоқларидаги бошланғич ташкилотларимиз қарияларнинг ҳурматини, айниқса, ўрнига қўймоқда. Ўнқўрғон қишлоқ ташкилотимиз бу соҳадаги ишлари билан жамғарманинг энг илғор ташкилотлари республика кўри-

гининг вилоят босқичида биринчи ўринни эгаллади. Биз Эркин Исабоев, Файзулла Қодирхўжаев, Қўнис Қорабеков каби оқсоқоллар етакчиларининг амалий иш тажрибаларини ҳамиша ибрат қилиб кўрсатмоқдамиз. Фахрийларимизнинг хайри ва эзгу ишларга бош-қош бўлиб, оқ фотиҳа беришлари ёшларимизга кўшимча куч-ғайрат бағишламоқда.

Сўнгги йилларда биз уруш ва меҳнат фахрийларига кўшимча равишда 1 миллион 413 минг сўм моддий ёрдам бердик. Бундан ташқари, қарияларга 25,5 тонна картошка, 18 тонна сабзи, 22 тонна пиёз тарқатдик. Бу ишларда Туроб Нормухамедов номли ширкат хўжалиги намуна кўрсатмоқда. Хуллас, қарияларимиз эл-юрт эҳтиромини кун сайин ҳис қилиб яшамоқдалар. Бу эҳтиром уларга алоҳида мамнунлик бағишлаётир.

ЙЎЛЛАР РАВОН БЎЛСА...

Зафар ЙЎЛДОШЕВ,

«ТОШКЕНТАВТОЙЎЛ» вилоят йўл ташкилотлари фаолиятини мувофиқлаштирувчи кенгаш бош муҳандиси:

— Бирлашмамиз ва унинг қарамоғидаги йўл хўжалиklarининг асосий вазифаси вилоят ҳудудида умумий фойдаланиладиган автомобиль йўллари ва уларнинг мажмуасига кирувчи кўприклар, ўтказилган қувурлар ҳамда йўллар атрофидаги йўл жиҳозлари, иншоотларига хизмат кўрсатиш, улар соз ҳолда бўлишини, транспорт воситаларининг белгиланган тезликда кечаю-кундуз тўхтовсиз, бехатар ва хавфсиз ҳаракатланишини таъминлашдир.

Йўлсозларимиз зиммаларидаги бу масъулиятни уддалаш учун барча имконият ва омилларни сафарбар қилмоқдалар. Йигирма биринчи асрнинг тўнғич йи-

лида катта ҳажмдаги бунёдкорлик ва таъмирлаш ишлари амалга оширилди. Жумладан, 1550 километр узунликдаги йўллар таъмирланди, олти кўприк қурилди ва кенгайтирилди. Автомобиль йўлларини жорий таъмирлаш, сақлаш, ободонлаштириш ва кўкаламзорлаштириш бўйича кўпгина ишлар амалга оширилди.

Ўтган йилни меҳнатда яхши кўрсаткичлар билан якунлаган жамоамиз янги йилда бажариладиган ишлар ҳажмини аниқ белгилаб олмоқда. Бу йилда ҳам вилоятимиз ҳудудидан ўтган барча йирик автомобиль йўллари ҳолатини янада яхшилашга ҳаракат қиламиз.

Таклифлар, тилаклар...

14 январь – Ватан ҳимоячилари куни

ҚУРОЛЛИ КУЧЛАР КЎМАКДОШИ

Ўн йилдирки, Ўзбекистон ўзининг Қуролли кучларига, армиясига эга. Ўзининг хавфсизлигини ўзи ҳимоя этмоқда. Ўзбекистон армияси сафларида содиқ, мард ўғлонлари юрт озодлиги, халқ тинчлиги учун шахдам қадамлар ташламоқдалар.

Мудофаага кўмаклашувчи «Ватанпарвар» ташкилоти эса, Ўзбекистон Республикаси Қуролли кучлари билан елкама-елка туриб, минглаб ёшларни ҳарбий хизматга чақирилгунга қадар жисмонан, ҳам маънан баркамол бўлишларида ўз хиссасини қўшиб келмоқда.

Шу йиллар мобайнида «Ватанпарвар» республика Қуролли кучларига керакли бўлган бир неча турдаги минглаб мутахассисларни етиштириб берди.

— Бизнинг ташкилот асосан ёшлар билан ишлайди, — дейди «Ватанпарвар» ташкилоти вилоят кенгаши раиси Карим Ваҳобов. — Ташкилотимизнинг барча туман ва шаҳар кенгашларида олтига бўлим фаолият юритади. Шулардан «Маънавият ва ҳарбий-ватанпарварликни тарғиб қилиш», «Спортнинг техник, ҳарбий ва амалий турлари», шунингдек, «Ҳарбий-техник тайёргарлик ва оммавий касб мутахассисларини тайёрлаш» бўлимлари ёшларни ҳар тарафлама етук қилиб тарбиялашга хизмат қилади.

— Бўлимимиз мутахассислари билан биргаликда ёшларнинг маънавий дунёқарашини шакллантиришга интиламиз, — дейди «Маънавият ва ҳарбий ватанпарварликни тарғиб қилиш» бўлими бошлиғи Рихсибой Солиҳов. — Бўлажак Ватан ҳимоячиларини ватанпарварлик руҳида тарбиялаш, уларнинг онгига Ватани, халқига муҳаббат туйғуларини сингдириш бизнинг асосий вазифамиз. Ташкилотимизнинг туман, шаҳар кенгашлари билан ҳамкорликда мактаб, касбхона билан юртлирида, турли ташкилот ва корхоналарда тарғибот-ташвиқот ишларини олиб борамиз. Хусусан, яқинда вилоят бўйича «Ватан саждагоҳ каби муқаддасдир» мавзусида эркин суҳ-

батлар ўтказдик. Шу каби тадбирларда бугунги кунда юртимизда олиб борилаётган илохотлар замирида қандай мақсадлар ётгани, Ватанимизнинг эртанги келажаги, порлоқ истиқболи ҳақида фикр-мулоҳазалар юритамиз. Ватандошларимизни, айниқса, ёшларни бу жараёнда фаол қатнашишга кенг жалб этиб, юрт озодлиги, халқимиз фаровонлиги йўлида бор куч-ғайратларини сарф этишга чақирамиз. Бу борада «Маҳалла», «Нуруний» жамғармалари, шунингдек, «Камолот» ёшлар ижтимоий ҳаракати билан ҳамкорликни кенг йўлга қўйганмиз. Улар билан ватанпарварлик ойлуклари ўтказаямиз.

«Спортнинг ҳарбий-техник ва амалий турлари» бўлими ўз-ўзидан маълумки, армия сафига чақирилувчи ўсмир ёшларни жисмонан бақувват бўлишларида, ҳар қандай



вазиятда Ватан ҳимояси учун тайёр туришларида кўмаклашади. Бунда спорт мусобақаларининг уюштирилиши, турли клубларнинг ташкил этилиши диққатга сазовордир.

Ташкилотимизнинг барча шаҳар, туман кенгашлари қошида «Ёш посбонлар» клублари тузилди. Бу эса, ўз навбатида спортнинг техник турларига ёшларни кўпроқ жалб этиш, улар билан кенг қамровли тарбиявий ишларни олиб бориш имконини беради.

2001 йил 14 декабрдан 2002 йил 14 январигача ўтказилаётган «Оммавий брилик» номи остидаги тадбирларни ҳаётга татбиқ этиш бўйича ҳам шаҳар ва туманларда қизгин ҳаракатни кузатиш мумкин. Жумладан, 26 декабрдан бошланган спортнинг кўп тури бўйича ўтатдиган мусобақаларни таъкидлаш жоиз. Унда ҳудуддаги корхона-ташкilotларнинг йигит-қизлари ва ўқув юртларининг юқори синф ўқувчилари ўзаро куч синашадилар. Ушбу мусобақаларнинг иккинчи босқичи

Ватан ҳимоячилари куни — 14 январга мўлжалланган.

«Ватанпарвар»да асосий вазифани бажарувчи «Ҳарбий техник тайёргарлик ва оммавий касб мутахассисларини тайёрлаш» бўлими Қуролли кучлар сафлари учун зарур бўлган ўнга яқин техник малакали мутахассисларни тайёрлаб беради. Ҳайдовчилар, ҳарбий муҳандислар, инструктор ва ҳоказолар шулар жумласидандир.

— Ушбу бўлим мутахассислари кенг миқёсда иш олиб борадилар, — дейди Карим Ваҳобов. — Ёшларнинг қурол ушлашдан тортиб, ҳарбий техникани бошқаришга бўлган жараёнлар юзасидан машғулотлар ўтказиш билан ушбу бўлимнинг шаҳар-туманлардаги мутахассислари шуғулланидилар. Ойлик ўқишлар ташкил этилган. Қуролли кучлар сафига чақирилиши лозим бўлган йигитлар ушбу ўқув курсларини тугатадилар.

Хуллас, Қуролли кучларимиз кўмакдоши бўлган «Ватанпарвар» ташкилоти ва унинг вилоятимизда олиб бораётган ишлари ҳақида кўп гапириш мумкин. Бугун ушбу ташкилот ҳам ўн ёшга тўлди. У шу йиллар давомида кўплаб мутахассис аскарларни тайёрлади, Ватан посбонларини тарбиялади, тажрибалар орттирди. Шу асосда у ўз фаолиятини янада такомиллаштирапти.

Равшан ЁҚУБЖОНОВ,
«Тошкент ҳақиқати» муҳбири.



СУРАТЛАРДА: 1. Кичик сержант А. Ҳасанов жанговар хизматга отланаётган чегара нарядига йўл-йўриқ бермоқда. 2. Зенит қурилмаси оператори оддий аскар Ж.Рўзиев машқда. Зафар ШАРИПОВ олган суратлар.

Илмий-амалий анжуман

Жаҳон иқтисодий ва дипломатия университетиде олий таълимда мураббийлик институти ва уни такомиллаштириш масалаларига бағишланган илмий-амалий семинар бўлиб ўтди. Унда олий ўқув юртларининг «Маънавият ва маърифат» ишлари бўйича ректор ўринбосарлари, мураббийлар кенгашининг раислари қатнашди.

Анжуманда «Мураббийлик фаолиятида амалий тарбиянинг муваффақиятлари ва истиқболлари», «Кадрлар тайёрлаш миллий дастурининг амалий ифодаси» мавзуларидаги маърузалар тингланди. Бу соҳада эришилган ютуқ ва тажрибалар таҳлил этилиб, уларни барча олий ўқув юртларида жорий этиш, мураббийлар кенгаши ишини янада фаоллаштириш юзасидан фикр-мулоҳазалар билдирилди.

Замон ЭШОНҚУЛОВ,
ЎЗА муҳбири.

Ҳар бир жамоанинг етакчи, илғор кишилари бўлади. Бошқалар улардан намуна оладилар, ўрганадилар, эргашадилар. Шу тариқа умумий ютуқлар кўлами кенгайди, салмоғи ортиб боради. Тошкент туманидаги Охунбобоев номли ширкат хўжалиги оилавий пудратчиси ёши етмишларни қоралаган деҳқон **Набиҳўжа Эшонов** ҳақида гап борганда беихтиёр ана шу фикрлар ёдга келади.

Дарвоқе, суяғи деҳқончиликда қотган Наби ака фаолияти билан танишар эканмиз, миришкорликда унга тенг келадиغانлар хўжаликда кам эканлигига ишонч ҳосил қилдик. У ҳамаша халқни, элни ўйлаб қадам босади. Айримлар бор, биркитилган ерга фақат харидорғир, бозорбоп экин экишга ҳаракат қилдилар. Шартномаларни бир амаллаб тўлдирган бўладиларда, қолган сара ва ортиқча маҳсулотни сотиб, мўмай даромад қиладилар.

Менинг бу мулоҳазамни эшитган Наби ака бош чайқади: — Биласиз-ку, сабзавот инсон учун энг зарур дори-дармондай гап. Лекин унинг бу ҳосияти қандай қилиб етиштирилишига, дастурхонда ҳамма турларининг бисёр бўлишига боғлиқ. Наби Эшонов ўзи айтган бу

ЮЗИ ЁРУҒЛИК — ФИДОЙИЛИК ИФОДАСИДИР

сўзларга қатъий амал қилади. 10 гектарга яқин майдонда картошкадан тортиб, сабзи, пиёз, саримсоқпиез, лавлаги, хуллас, сабзавотнинг ҳар бир туридан, ҳатто кўкатларгача экиб, мўл ҳосил етиштиришга ҳаракат қилади. Шундай йиллар ҳам бўладики, об-ҳавонинг қулай келганлигидан фойдаланиб, бир майдондан уч марта ҳосил олади.

Қандай қилиб дейсизми? — Бу сизнинг ерга бўлган муносабатингизга, ундан қандай фойдаланишингизга, тўғрироғи, ҳар қарич ерни қадрлаб, эъзозлашингизга боғлиқ, — дейди у. — Мен сизга айтсам, ернинг ҳам жони бор. Экин танлайди. Айрим карталар бор, картошка эксангиз, парваришини ўрнига қўйсангиз, парвариши ҳосил тўкадики, асти қўяверасиз. Айрим далалар эса помидорни хуш кўрмайди. Карам

экилган далада сабзи яхши битмаслиги мумкин. Шунинг учун биз ўзимизга биркитилган майдонларнинг «фёъл-атворини яхши билиб олиб, шунга яраша муомала» қилиб кам бўлмаямиз. Бу бир. Иккинчидан, уруғда гап кўп, деб қайта-қайта айтаемиз. Аммо бунга амал қилмайдиганлар ҳам бор. Биз эса, ўзимизга керакли экинлар уруғини алоҳида карталарга экиб, талабга яраша парвариш қилиб етиштирамиз. Юқоридан бериладиган ёки тавсия қилинадиган уруғликларга кўп ҳам умид боғламаймиз. Ахир айтадилар-ку, оғзи куйган қатикни ҳам пуфлаб ичади, деб. Бир вақтлар мақтаб берган уруғларини экиб, чув тушиб қолганмиз.

Энди уруғни танлаб, саралаб экишнинг ҳосияти катта. Навқирон, ёш одамнинг иши унумли, натижаси самарали бўлганидек,

уруғнинг ҳам янғиси яхши ҳосил беради. Шуни ҳисобга олиб биз асосан иккинчи, нари борса, учинчи авлодга мансуб сабзавот уруғларидан фойдаланамиз.

Хўжалик раиси Искандар Фозилов ҳам суҳбатимизга қўшилди:

— Айтмовдимми, Наби ака ўз ишининг профессори, деб. У киши билан мулоқотда бўлсангиз, ҳар сафар деҳқончиликка оид янги фикр оласиз.

Дарвоқе, Наби ака бугун амалга оширган яхши иши-ю, эришган натижасидан мағрурланиб, хотиржамликка берилмайди. Янгиликка интилиб, излашдан чарчамайдиган деҳқонлардан. Шунинг учун ҳар йили 250-300 тоннага яқин сара маҳсулот етказиб беради, шартнома шартларини ортиги билан бажаради. Ҳосилдорликни эса 300 центнердан камайтирмайди.

— Йил якунидан мамнунмисиз? — сўраймиз Наби акадан. — Бўлмасамчи, — дейди у. — Мўл, сифатли ҳосил етиштирилганимиз учун оилавий даромадимиз анча мўмай бўлди. Орзу-ҳавасимизга ҳам етиб ортади. Қисқаси, бизга ўхшаган қариялар янада қадрланадиган йилни ёруғ юз билан қутиб олдик.

Юзи ёруғлик — фидойилик, деҳқон ҳимматининг ифодасидир. Бундай олижаноблик ҳар бир меҳнат кишисига хос фазилат бўлиб қолаверсин.

Носир РИХСИЕВ.

Шундайлар бор бўлсин

Маълумки, 2001 йил 29 июнда Ўзбекистон Республикаси Вазирлар Маҳкамасининг «Гастрол-концерт фаолияти соҳасида солиқ солишни ва аудио-видео кассеталарни тарқатишни такомиллаштириш чоратадбирлари тўғрисида» қарори эълон қилинди.

Унинг ижросини таъмин этиш юзасидан эса Тошкент вилояти ҳокимининг ўтган йил 14 ноябрда махсус қарори ҳам қабул қилинди. Бу қарор ўз вақтида барча туман ва шаҳар ҳокимликларига етказилган эди. Унда қайд этилишича, гастрол-концерт фаолияти билан шуғулланиш ҳуқуқи учун лицензия олувчи юридик ва жисмоний шахслар «Ўзбекнаво» эстрада бирлашмаси томонидан белгиланадиган рейтинг гуруҳига кўра табақалаштирилган миқдорда давлат божи тўлайдилар ҳамда бюджетта давлат солиқлари ва маҳаллий солиқлар тўлашдан озод этиладилар; грампластинкалар, аудио ва видео кассеталар, лазер дискларни ишлаб чиқариш, кўпайтириш ҳамда сотиш бўйича фаолият фақат юридик шахслар томонидан амалга оширилади ҳамда вилоят ҳокимлиги томонидан лицензиялаштирилади; лицензияга эга бўлган юридик шахслар мулк солиғидан ташқари солиқлар ва йиғимларнинг барча турларини тўлаш ўрнига бюджетта табақалаштирилган ставкалар бўйича ялпи даромад солиғи тўлайдилар. Хўш, орадан шунча вақт ўтиб, бу ишларда биронта силжиш бўлди-ми? Биз шу савол билан «Ўзбекнаво» эстрада бирлашмаси вило-

ят бўлими раҳбари Рамзиддин Икромовга мурожаат этдик.
— Вилоят ҳокимининг қарорига асосан шаҳар ва туман ҳокимликлари мазкур масалалар билан шуғулланувчи вакилларини белгилаш-

кўпгина солиқлардан озод этиладилар. Бу ишимизни бир қадар осонлаштиради, катта имкониятлар яратади. Афсуски ҳозиргача бирон бир туман ва шаҳарда бу борада биронта ташкилий иш қилинмади. Бу маъсулиятсизлик, белгиланган қонунлардан бўйин товлаш эмасми?

— Вилоят ҳокимининг 2001 йил 9 декабрдаги қарорида яна бир бор қатъий қилиб белгилаб қўйил-

Қарор ва ижро

ларга нисбатан кескин чоралар қўлланилади, — деб давом этди Р. Икромов. — Айни пайтда биз ҳам кўпгина тадбирларни амалга оширмакдамиз. Туманларда, шаҳарларда фаолият кўрсатувчи шахсларга лицензия олиш, бундан буён қонуний иш юритиш борасида тушунтириш ишлари олиб бордик. Учрашувларда, суҳбатларда, вилоят Давлат солиқ бошқармаси, ички ишлар бошқармасининг ҳуқуқбузарликларнинг олдини олиш бошқармаси, божхонанинг маъсул ходимлари ҳам иштирок этдилар. Бундан ташқари ички ишлар участка профилактик нозирлари билан ҳам суҳбат ўтказдик. Энди улар ўз ҳудудларидаги аҳолини қатъий назорат қиладилар.

Яна бир гап. Ҳар бир туман ва шаҳарда маданият бўлимлари фаолият кўрсатиб келади. Улар фақатгина оммавий тадбирларда концертлар уюштириш билан чекланиб қолаёттилар. Аслида вилоят ҳокимининг қарорини бажаришда улар ҳам бевосита иштирок этишлари зарур. Ана шундагина қонун-қонидларга тўлиқ амал қилинади, кўзда тутилган солиқлар тўланади, ижодий ҳамда тадбиркорлик фаолиятига кенг йўл очилади. Халқимизда «Қоидали иш — келтирмас ташвиш» деган ибратли нақл бор. Шунга амал қилинса, ҳамма соҳалардаги юмушлар ўз маромида боришига шубҳа йўқ.

ҲУЖЖАТИНГИЗ БОРМИ, БИРОДАР?!

лари лозим эди. Афсуски шу пайтгача Чирчиқ шаҳридан бўлак ҳеч қайси ҳудуддан биронта вакил бизга мурожаат этгани йўқ. Вакил дастлаб суҳбатдан ўтиши, шундан кейин юқорида тилга олинган юмушларни назорат этиши зарур. У лицензия олиш учун ҳужжатларни қабул қиладилар ва бизга тақдим этади. Лицензиялар асосан гастрол-концертлар ташкил этиш, тўйларда, барларда, дискотекаларда хизмат кўрсатиш учун берилди. Вазирлар Маҳкамасининг қароридан таъкидланганидек давлат божи тўлагач фаолият юритувчилар

дики, фаолиятнинг кўрсатиб ўтилган турлари билан тегишли лицензия олмасдан шуғулланувчи шахслар амалдаги қонунларга мувофиқ жавобгарликка тортиладилар; шаҳар ва туман ҳокимликлари «Ўзбекнаво» эстрада бирлашмаси Тошкент вилояти бўлимига гастрол-концерт, грампластинкалар, аудио-видео кассеталар, лазер дискларни ишлаб чиқариш, кўпайтириш ва сотишни назорат қилувчи вакилларини тавсия қилишлари, уларнинг иш юритишларини мувофиқлаштиришлари шарт. Кўриниб турибдики қарорни ижро этмаган-

Таълим ислоҳотлари — амалда

Қадрлар тайёрлаш миллий дастурининг иккинчи босқичи ўқув юрталарида таълим ва тарбия жараёнини сифат жиҳатдан янги поғонага кўтариш, ўқитувчилар малакасини ошириш, соҳага замонавий технологияларни, компьютер, интернет, масофадан ўқитишни кенг жорий қилишни тақозо этади.

Олий ва ўрта махсус таълим вазирлиги, Иқтисодиёт, бизнес, мутахассисларнинг малакасини ошириш ва қайта тайёрлаш институти, Тошкент Давлат иқтисодиёт университети ҳамкорликда «Қадрлар тайёрлаш миллий дастурининг иккинчи босқичида академик лицей ва касбхунаро коллежлари тизимини ривожлантиришнинг долзарб масалалари» мавзусида ўтказилган семинарда мутахассисларнинг шу ҳақдаги маърузалари тингланди.

Анжуманда Олий ва ўрта махсус таълим вазири С. Фуломов иштирок этди.

**Замон ЭШОНҚУЛОВ,
ЎЗА муҳбири.**

Ёшлар карнавали

«Ўзкўргазмасавдо» мажмуида пойтахтимиздаги олий ўқув юрталари талабалари, ўзбек эстрада санъатининг ёш ва истеъдодли намояндалари — «Умид юлдузлари» фестивали совриндорлари иштирокида ёшларнинг янги йил карнавали бўлиб ўтди.

Тадбир Тошкент шаҳар ҳокимлиги, «Камолот» ёшлар ижтимоий ҳаракати, Олий ва ўрта махсус таълим вазирлиги, Ўзтеле радиокорпорацияси ҳамда «Замин» студияси томонидан талабаларимизнинг қишқик таътилни мароқли ўтказиш, ўзаро дўстликни мустаҳкамлаш, шунингдек, ёш истеъдодларни қўллаб-қувватлаш мақсадида ташкил этилди.

«Замин» студияси раҳбари С.Абдуллаев саҳналаштирган байрам дастуридан турли томошалар билан бир қаторда «Карнавал маликаси», «Бетакор либос эгаси» каби кўриктанловларга кенг ўрин берилди. Саҳнани бадий безаш ишларини Тошкент халқаро бизнес маркази ва «Совласт-итал» қўшма корхонаси амалга оширди.

— Мустақил мамлакатимизда илк бор ўтказилган ушбу карнавал самимийлиги, ёшларга хос шижоати ва жўшқинлиги билан менда унутилмас хотира қолдирди, — деди ЎЗА муҳбири билан суҳбатда Тошкент Давлат жисмоний тарбия институти 2-курс талабаси Умиджон Саидов. — Бу ерда янги танишлар орттирдим, улар билан ўқиш ва изланишларимиз тўғрисида суҳбатлашдик.

— Мени тенгдошларимнинг замонавийлик ва миллийликни ўзида уйғунлаштирган либослари ҳайратга солди, — дейди Ўзбекистон Миллий университети талабаси Азиза Юсупова. — Карнавалда намойиш этилган ҳар бир либос, аввало, ёш чеварларимизнинг улкан истеъдоди, ўзига хос дид ва нафосатидан, қолаверса, санъаткорона изланишидан далолат беради.

**Баҳор ХИДИРОВА,
ЎЗА муҳбири.**

Sport Sport Sport

Футбол Олий лигамиз — кучлилар орасида

Футбол тарихи ва статистикаси халқаро федерацияси 1991 йилдан буён йил давомида ўтказилган миллий ва халқаро мусобақалар натижаларини махсус формула бўйича ҳисоблаб, дунёдаги энг кучли футбол лигалари рўйхатини эълон қилмоқда.

Испания биринчилиги мазкур федерация томонидан 2001 йилнинг энг кучли лигаси деб топилди. Худди ўтган йилгидек, Англия премьер-лигаси ва Италиянинг «А» серияси иккинчи ва учинчи поғонада қайд этилди.

Ўзбекистон миллий биринчилигининг олий лигаси, федерация наздида, жаҳондаги энг кучли 50 та лига рўйхатидан 41-поғонага лойиқ кўрилди.

Шохмат Қосимжонов Карповдан олдинда

Халқаро шахмат федерацияси — ФИДЕ уч ойда бир марта жаҳоннинг энг кучли шахматчилари рўйхатини эълон қиладилар.

2002 йилдаги дастлабки рейтингда россиялик шахмат устаси Гарри Каспаров 2838 очко билан етакчилик қилмоқда. Ундан 29 очко кам тўплаган Владимир Крамник иккинчи, ҳиндистонлик Вишванатан Ананд 2757 очко билан учинчи поғонани эгаллаган.

Ўзбекистонлик истеъдодли ёш гроссмейстер Рустам Қосимжонов 2695 очко билан кучлилар рўйхатининг 15-поғонасида қайд этилган. Яна бир машҳур россиялик шахматчи Анатолий Карпов эса Р. Қосимжоновдан икки очко кам тўплаган ҳолда 16-ўринни эгаллаб турибди.

(ЎЗА).

ЁШ КАРАТЭЧИЛАР — МАЙДОНДА


Анъанавий каратэ-до федерациясининг Фазалкент ўқувчи-ёшлар гуруҳида машқлар мунтазам олиб борилмоқда. Бу машғулотларда 110дан ортиқ ўқувчи қатнашаётир. Катта-катта халқаро мусобақаларда иштирок этган маҳоратли спорт устаси Жамшид Эрматов уларга устозлик қилмоқда.



— Польшанинг Замосх шаҳрида ўтган халқаро турнирда устозимиз биринчи ўринни эгаллаганлар, — дейди ёш спортчи Ниёз Юнусов ҳавас билан. — Россияда ўтган мусобақада ҳам кўпгина рақиблардан устунлик қилганлар. Қора белбоғ соҳиби Жамшид аканинг ҳар бир ҳаракати, машғулотлари биз учун катта сабоқ бўлаётти.

Ниёзжоннинг ўзи энди ўн икки ёшдан ошди. Лекин, устоз сабоқлари бекор кетмаётганлигини кураш майдонларидаги ютуқлари билан аллақачон исботлаб улгурди. У Фазалкент шаҳар мактабларининг ўқувчилари ўртасида каратэ бўйича мусобақаларда биринчи ўринни эгаллади.

Чирчиқ шаҳридаги анъанавий каратэ-до федерацияси президенти Шароф Раҳмонов ҳам ўқувчилар ўртасида спортнинг бу турини оммалаштириш борасида қизғин иш олиб бормоқда. Шаҳарнинг олти мактабида 150дан ортиқ ўқувчини бирлаштирган спорт гуруҳларида маҳорат машқлари ниҳоятда самарали ўтаётир.



СУРАТЛАРДА: 1. 10-11 ёшлар ўртасида каратэ-до бўйича биринчи ўрин соҳиби Шаҳзод Эрнўлатов ғалаба шохсупасида. 2. Қора белбоғ соҳиби Жамшид Эрматов навбатдаги машғулотни ўтказмоқда. 3. Мусобақа пайтидан лавҳа.

**Владимир ПОРТНОВ
олган суратлар.**



Xalq va dunyo

Mamlakatlar
Odamlar
Voqealar
G'aroyibotlar

Ёвуз ниятли одамлар

«Ал-Қоида»нинг «маънавий отаси», Усома бин Лодиннинг «ўнг қўли» кимлигини биласизми? У - Айман аз-Завоҳирий, 1951 йил Қоҳирада жарроҳ оиласида дунёга келган. Мисрда фаолияти таъқиқланган ташкилотга аъзо бўлгани учун биринчи марта 15 ёшида ҳибсга олинган, бироқ жинояти исботланмагани туфайли озод этилган. Орадан йиллар ўтгач, Миср хавфсизлик хизмати жиддий хатога йўл қўйганини англаб етди. Лекин, энди кеч эди.

«Ал-Қоида» ҳар доим энг ашаддий террорчилар учун ишончли паноҳ бўлиб келган. Турли миллат ва элатларга мансуб, ёвуз қарашларни тарғиб қилган террорчилар айнан «Ал-Қоида» орқали танишиб, бирлашган. Ташкилотдаги энг муҳим ва масъулиятли лавозимларни ҳамisha мисрликлар эгаллаган. Уларни жарроҳ Айман аз-Завоҳирий бошқариб туради. Айнан шу шахс, мана бир неча йилдирки, Усома бин Лодиннинг суянган тоғи бўлиб келмоқда.

1992 йили Усома бин Лодин ҳамда Айман аз-Завоҳирий «Яҳудий ва салбчиларга қарши курашнинг халқаро ислом fronti» тузилганини эълон қилди. Унинг асосий вазифаси терроризмни ривожлантиришдан иборат деб белгиланди. Бироқ, бу фикр «Ал-Қоида»нинг мисрлик аъзолари томонидан қўллаб-қувватланмади. Улар жиҳод эълон қилинган давлатлар ҳукуматларига қарши кура-

шиш лозим, деган фикрни ўртага ташлади. Натижада ўтган асрнинг 90-йилларида дунёнинг қатор давлатларида, хусусан, Мисрнинг ўзида ҳам ҳукумат вакиллари га суиқасдлар авж олди, дунё террор ботқоғига бота бошлади. Кейинчалик «Ал-Қоида»нинг қарашларида бин Лодиннинг фикрлари устун келиб, террорчилар АҚШга эътиборни кучайтирди. АҚШнинг Кения ва Танзаниядаги элчихоналари, Яманда «Коул» ҳарбий кемаси портлатилди, сўнг 11 сентябрь воқеалари юз берди. Юқоридагилар дунё ҳамжамиятининг диққатини тортган воқеалар эди. Булардан ташқари яна қанчадан-қанча «майда» портлашлар, суиқасдлар жаҳон ҳамжамиятининг назаридан четда қолганини аниқ айтиш қийин.

Жаҳон ҳамжамияти террорга қарши ҳамкорликда курашишга киришган ҳозирги даврда бу ёвуз ниятли шахсларнинг куни битмоқда.

Бобур СОБИРОВ,
ЎЗА шарҳловчиси.

ЭНГ ОҒИР БУЛЬДОЗЕР



Дунёдаги энг оғир бульдозер Челябинск трактор заводи томонидан 1984 йилда ишлаб чиқарилган «Т-800» бульдозери ҳисобланади. 1990 йилга қадар заводда ҳар бири 100 тонна тош босувчи бундай бульдозерларни 9таси ишлаб чиқарилган.

«ТОЗА ҲАВО — ТАНГА ДАВО»

Ҳиндистонлик Мастрам Бопу билан боғлиқ ушбу маълумотни ўқигач, ҳар қандай киши ҳам шундай фикрга келиши аниқ. Читра кишлоғилик бу соқов фақир 22 йил шахарга олиб борувчи катта йўл ёқасидаги дўнгдан жилмаган, кечани ҳам, кундузни ҳам шу ерда ўтказган.



Лондон. Маиҳур Бигбен соатли минораси.

Eng so'nggi xabarlar



«6+2» гуруҳига аъзо давлатлар вакиллари келаси ҳафта Кобулда учрашув ўтказмоқчи. Учрашувда Ўзбекистон, Россия, АҚШ, Хитой, Эрон, Покистон, Тожикистон ва Туркменистон вакиллари иштирок этади. Улар Афғонистон иқтисодини тиклашда муваққат ҳукуматга ёрдам кўрсатиш масалаларини муҳокама қилади.

Исроил адлия вазири Меир Шитритнинг фикрича, бир неча кун илгари Қизил денгизда ушланган курул-аслаҳа ортилган кема Фаластин жангариларига тегишлидир. Фаластин раҳбари Ёсир Арафот бу ишга бевосита алоқадор, деди у. Бироқ, Фаластин томони Исроилнинг айбловини рад этмоқда.

21-22 январь кунлари Япония пойтахтида Афғонистон иқтисодини тиклаш масаласига бағишланган халқаро анжуман ўтказилади. Унда эликдан ортиқ мамлакат ҳамда халқаро ташкилотлардан вакиллар иштирок этиши кутилмоқда.

Жанубий Африка Республикасида (ЖАР) Исроил ва Фаластин вакиллари учрашуви бошланди. Талбирда ЖАР президенти Табо Мбеки ҳам иштирок этмоқда. Уч кунга чўзиладиган ушбу анжуманда Исроил-Фаластин тинчлик музокараларини тиклаш масалалари муҳокама қилинади.

Япония бош вазири Дзюнитиро Коидзуми Жануби-Шарқий Осиё давлатлари бўйлаб сафарга чиқди. У Филиппин, Малайзия, Таиланд, Индонезия ҳамда Сингапурда бўлади ва ушбу давлатлар раҳбарлари билан минтақавий ҳамкорликни кенгайтириш масалалари юзасидан музокара ўтказилади.

АҚШ давлат котиби Колин Пауэлл келаси ҳафта Ҳиндистон ва Покистонга бормоқчи. Давлат департаменти расмий вакили Ричард Баучернинг айтишича, К.Пауэлл мазкур мамлакатлар раҳбарлари билан учрашиб, икки давлат ўртасидаги кескинликни бартараф этиш масалаларини муҳокама қилади. Шунингдек, унинг Японияда Афғонистон иқтисодини тиклаш масаласига бағишлаб ўтказиладиган халқаро анжуманда ҳам иштирок этиши кутилмоқда.

(ЎЗА).

Турфа олам

ФИШТ ИЧИДАГИ «ХИКМАТ»ЛАР


Санкт-Петербургда, Салтиков-Шчедрин номидаги кутубхонанинг қўлёзмалар бўлимига бир вақтлар Ўрта Осиёдан қизик бир жўнатма келган эди. Ушбу жўнатма кичикроқ хом фишдан иборат эди. Бундай ўхшовсиз фишлар илгари хўжалик биноларини қуришда ишлатиларди. Фиш билан бирга қўшиб юборилган хатда кекса гидрогеолог Санкт-Петербургда олимларининг эътиборини фиш ёруғидан кўриниб турган қоғозларга жалб қилган.

Реставраторлар қарийб ярим йил мобайнида қоғоз варақларини фишдан ажрати олиш билан шуғулландилар. Бу иш муваффақият билан тамомланди. Фиш орасидан ажратиб олинган қоғозлар ўзбек адабиётининг йирик намоёнчаси ҳазрат Аҳмад Яссавийнинг машҳур «Хикматлар»и бўлиб чиқди.

Мутахассислар китобнинг бу қўлёзмаси бундан икки юз йилдан ошикроқ вақт илгари хаттотлар томонидан кўчирилганлигини аниқладилар.

ОШҚОЗОНДАГИ БУЮМЛАР

Рухий хасталикнинг антиқа тури билан касалланган канадалик хонимнинг воқеаси жуда қизик. Унинг одати нимаики буюм учраса, дарров оғизга тиқиб ютиш бўлган. 42 ёшида аёл қорни тинимсиз санчиб оғришидан нолиган. Шунда Онтарио шахрида жарроҳлар томонидан унинг қорни ёриб кўрилганида, ошқозонидан жами 2533 дона буюм, шу жумладан 947та тўғноғич чиқариб олинган.



Худди шунга ўхшаш воқеа 1985 йилда ҳам содир бўлган. Жанубий Африканинг «Гротт Шуур» касалхонасига оғир аҳволда келтирилган эркакнинг ошқозонидан «212 дона буюм топилган. Улар орасида 53та тиш ювадиган чўтка, 2та телескоп антеннаси, иккита устара ва 150 дона бир марта фойдаланиладиган соқол олиш мосламаси бор эди.

АҚШда эса куйидаги аломат воқеа содир бўлди: 24 яшар руҳан хаста бир бемор аёл узунлиги 12,7 сантиметрли эшик ошиқ-мошиғини ютиб юборган. Қизиги шундаки, темир ошиқ-мошиқ аёлнинг ўн икки бармоқли ичагидан ошқозон ҳамда ҳазм қилувчи бошқа ичаклардан бемалол ўтиб, у ўтирган чинни тувакни чил-чил қилган.

(ЖАҲОН ОММАВИЙ АХБОРОТ ВОСИТАЛАРИ ХАБАРЛАРИ АСОСИДА ТАЙЁРЛАНДИ).

«МОТОРЛИ ОТ»

«Автомобиль» сўзи қачон пайдо бўлган? 1769 йилда француз механиги Куньо буг двигателида ишлайдиган ўзиюрар юк машинасини ихтиро қилганда, жуда катта шов-шувга сабаб бўлганди. Машина аслида иккита от кучига эга бўлиб, соатига бор-йўғи



тўрт километр йўл босарди. 1882 йилда рус механиги Путилов ва Хлобовлар бензин билан ишлайдиган двигателли машина яратишди. Немис механиклари Бенц ва Даймлерларнинг ихтиролари «моторли от» деб аталган. Автомобиль сўзи эса, 1894 йилдан бошлаб қўлланилади. Ушанда Париж-Руан йўли бўйлаб биринчи халқаро автомобиль пойгаси ўтказилганди. Машиналарнинг тезлиги эса, соатига 20 километрни ташкил этарди.

Акбар АЛИЕВ тайёрлади.

Турфа олам

